

广东通志

广东通志

廣東通志卷二百六十三

甲子重刊

謫宦錄二

宋至明

李符

馮拯

牛冕

張適

姚鉉

寇準

丁謂

李仲昌

任守忠

唐介

唐炯

鍾傳

王輦

章惇

曾布

朱翌

李璆

趙震

張莊

王寓

趙永忠

馮時行

周勣

陳鵬飛

折彥質

張浚

梁成大

張震發

何興

秦九韶

韋訖

林一飛

李曇

周湏

李思迪

趙起潛

黃諫

江朝宗

杜宥

邵銅

羅俊

黃瓌

伍希淵

陳瑄

劉玉

錢溥

魏瀚

鄒智

陳琳

王獻臣

戴冠

李中

張文明

王思

周廣

林應驄

潘恩

胡松

張聽

黃國用

陳察

陳謹

程文德

孫如法

羅大紘

陳泰來

高攀龍

湯顯祖

李曰輔

趙士春

陳九疇

已上宋至明

謹案宋代死後追貶者有司馬光王巖叟
孔文仲呂公著王珪李清臣六人未赴謫
所者有許高許亢二人明代未赴謫所者
有岳正潘鏗二人俱不錄

宋

李符字德昌大名內黃人初仕漢宋太平興國初
知廣州兼轉運使五年召爲右諫議大夫判吏部
銓兼大理寺理三司副使范明得罪以符代之未

幾坐與官屬競課最罷職守本官七年春開封尹
奏王廷美出守西京以符知開封府廷美事發趙
普令符上言廷美在西洛非便恐有他變宜遷遠
郡以絕人望遂有房陵之貶普恐泄言坐符用刑
不當貶寧國軍行軍司馬先是太宗尹京符因宋
琪薦彌德超事藩邸符貶德超爲樞密副使屢稱
其寃會德超以事貶帝惡其明黨徙符嶺表普移
符知春州盧多遜之貶崖州也符白普曰珠崖雖
遠在海中而水土頗善春州稍近瘴氣甚毒至者
必死願徙多遜處之普不答故有是移在郡歲餘
卒年五十九符無文學有吏幹好希人主意以求

進用終以此敗

宋史本傳

馮拯字道濟舉進士補大理評事洊擢右正言澹
化中有上封事請立皇太子者拯與黃裳王世則
洪堪伏閣請立許王允僖太宗怒悉貶嶺外拯知
端州既至上言請遣使括諸路隱丁更制版籍及
議鹽法通商凡十餘事太宗欲召還參知政事寇
準素不悅拯乃徙知鼎州改通判廣州遷尚書員
外郎宋史本傳拯知端州見嶺表鳥獸草木民俗物情
舉異中原錄爲三十門凡三百事還朝上之文獻通考
牛冕字君儀徐州彭城人太平興國三年進士咸
平元年選知益州兩川自李順平後民罹困苦未

安其業朝廷緩於矜恤故成卒乘符昭壽之虐嘯
集爲亂冕與轉運使張適委城奔漢州詔遣赴闕
至京兆劾其罪並削籍流儋州適爲連州參軍冕
遇赦移欽英二州歷鄂海二州別駕淮南節度副

使

宋史
本傳

姚鉉字寶之廬州合肥人太平興國八年進士甲
第咸平三年爲起居舍人京東轉運使徙兩浙路
鉉雋爽頗尙氣薛映知杭州與之不協事多矛盾
映撫鉉罪狀數條密以聞詔使劾之當奪一官特
除名貶連州文學吉州之萬安抵虔江有贛石舟
行其中湍險萬狀鉉過感而賦之以自況大中祥

符五年會赦移岳州鉉文詞敏麗善筆札藏書至多頗有異本雖被竄斥猶傭夫荷檐以自隨有集

二十卷又采唐人文章纂爲百卷目曰文粹

宋史本傳

寇準字平仲華州下邳人年十九舉進士累遷三司度支推官轉鹽鐵判官會詔百官言事而準極陳利害帝益器重之擢尚書虞部郎中樞密院直學士判吏部東銓嘗奏事殿中語不合帝怒起準輒引帝衣令帝復坐事決乃退上由是嘉之淳化三年拜參知政事至道元年加給事中帝嘗問準曰朕諸子孰可以付神器者準曰陛下爲天下擇君謀及婦人中官不可也謀及近臣不可也唯陛

下擇所以副天下望者帝俛首久之屏左右曰襄
王可乎準曰知子莫若父願卽決定帝遂以襄王
爲開封尹改封壽王立爲皇太子二年祠南郊中
外官皆進秩準素所喜者多得臺省清要官所惡
不及知者退序進之彭惟節素居馮拯下拯轉虞
部員外郎惟節轉屯田員外郎章奏列銜節猶處
其下準怒堂帖戒拯毋亂朝制拯憤極陳準擅權
太宗怒及準入對猶力爭不已又持中書簿論曲
直於帝前帝益不悅遂罷準知鄧州真宗卽位遷
尙書工部侍郎帝久欲相準患其剛直難獨任景
德元年冬契丹入帝親征至南城契丹兵方盛

衆請駐蹕以覘軍勢準力爭之帝遂渡河契丹相
視驚愕不能成列帝盡以軍事委準河北罷兵準
之力也天禧三年爲尙書右僕射集賢殿大學士
時真宗得風疾劉太后預政於內準密令翰林學
士楊億草表請太子監國且欲援億輔政已而謀
洩罷爲太子太傅封萊國公時內侍都知周懷政
反側不自安且憂得罪乃謀殺大臣請罷皇后豫
政奉帝爲太上皇而傳位太子復相準客省使楊
崇勲等以告丁謂謂以聞乃誅懷政降準爲太常
卿知相州徙安州貶道州司馬帝初不知也他日
問左右曰吾目中久不見寇準何也左右莫敢對

帝崩時亦言惟準與李迪可託其見重如此乾興
元年再貶雷州司戶參軍初丁謂出準門至參政
事準甚謹嘗會食中書羹污準鬚謂起徐拂之準
笑曰參政國之大臣乃爲官長拂鬚耶謂甚愧之
由是傾構日深及準貶未幾謂亦南竄道雷州準
遣人以一蒸羊逆境上謂欲見準準拒絕之聞家
僮謀欲報仇者乃杜門使縱博毋得出伺謂行遠
乃罷天聖元年徙衡州司馬準在雷州踰年旣卒
衡州之命乃至遂歸葬西京

宋史
本傳

丁謂字謂之後更字公言蘇州長洲人淳化三年
登進士第天禧三年以吏部尙書參知政事時寇

準爲相尤惡謂謂媒孽其過遂罷準相旣而拜謂
同中書門下平章事昭文館大學士監修國史乾
興元年封晉國公仁宗卽位二府定議太后與帝
五日一御便殿謂潛結內侍雷允恭傳達中旨而
不欲同列與聞機政允恭爲山陵都監與判司天
監邢中和擅易皇堂地誅後數日太后與帝坐承
明殿曰丁謂爲宰輔乃與宦官交通因出謂嘗託
允恭令後苑匠所造金酒器又出允恭嘗干謂求
管勾皇城司及三司衙門狀乃降謂太子少保分
司西京先是女道士劉德妙者嘗以巫師出入謂
家謂敗逮繫德妙內侍鞠之德妙通欵謂嘗教言

若所爲不過巫事不若託言老君言禍福足以動
人於是卽謂家設神像夜醮於園中允恭數至請
禱及帝崩引入禁中又因穿地得龜蛇令德妙持
入內給言出其家山洞中仍復教云上卽問若所
事何知爲老君第云相公非凡人當知之謂又作
頌題曰混元皇帝賜德妙語涉妖誕遂貶崖州司
戶參軍在貶所專事浮屠因果之說其所著詩文
亦數萬言家寓洛陽嘗爲書白克責敘國厚恩戒
家人毋輒怨望遣人致于洛守劉煜祈付其家戒
使者伺煜會衆僚時達之煜得書不敢私卽以聞
帝見感惻遂徙雷州

宋史本傳

初丁謂逐京師爲之語

曰欲得天下寧當拔眼中釘欲得天下好莫如召
寇老迨謂投荒天聖五年祀南郊中外意謂復還
御史中丞陳炎字伯玉相州永定人上疏畧曰丁
謂因緣險佞據竊公台賄賂苞苴盈於私室威權
請謁行彼公朝先帝上仙首膺顧命聖君纘緒盍
罄公忠乃陰蓄姦謀玩窺神器引巫師之妖術因
魘魅於宮闈易神寢之龍圖冀消除於王氣漢臣
獲罪合行盤水之誅君集就烹豈顧凌烟之像國
家終恢全度特屈深仁止行奪爵之文才示投荒
之責歲月未幾覺惡益彰中外於茲痛憤猶積今
展禋柴之禮特推渙汗之恩凡爲得罪之人悉有

滌瑕之望必慮丁謂潛輸琛貨私結要權尙假息

於遐荒冀量移於善地李德裕止因朋黨不獲生

還盧多遜曲事王藩更無牽復伏請更不原赦上

從之

周輝清波別志

又三年徙道州復秘書監致仕居安

州又徙光州卒年七十二謂性儉巧而善談笑在

朱崖嘗問客天下州郡孰爲大客曰京師也謂曰

不然朝廷宰相作崖州司戶參軍則崖州爲大也

聞者絕倒

東都事畧本傳

李仲昌聊城人垂子稍知名然銳於進取嘗獻計

修六塔河無功自殿中丞責英州文學參軍卒

東都

事畧李

垂傳